

PIIA MUITALUS

SIRI BROCH JOHANSEN

Piia lávii liikot skuvlii. Ovdal. Muhto maŋŋá go jumežat álggiiga sin luohkkái, lea buot rievdan.

Piia ain muitá vuosttáš háve go soai bođiiga luohkkálatnjii, guokte gándda, áibbas oanehis vuovttaiguin, seammalágán lávkaiguin ja Adidas hárjehallanbuvssaiguin. Soai čuoččuiga doppe, geahčaiga birrat birra, guovllaiga juohke áidna ođđa luohkkáverdii. Káspár jorgalii oaivvi ja savkalii juoidá Pedára bealljemáddagii. Pedár boagustii. Nie de álggii.

Káspár ja Pedár. Piia ii goassege ádden manne soai álo leigga jur su maŋis. Lei gusto juoga nu boastut sus álo. Piia vuovttat ledje menddo smarvái, ja boastu ivdni dain, velá. Piia gápmagiin maid boastut ivdni, leat dušše čivggat geat háliidit rosa gápmagiid. Piia lávka lei menddo gollán, ja vearrámus lei goit ahte juohke háve go Piia hálai, de gándaguovttus reškkiiga. Vuosttáš háviid go ná geavai, de Piia smiehttagođii maid son son lei dadjan mii lei nu somá, muhto de gulai sudno hállamin reaškasiid gaskkas: «dego sáhpán! Hiiihiii...»

Gal oahpaheaddji várra fuomášii ahte Piia lei dađistaga jávohuvvan, muhto ii son goassege dadjan maidege Káspáarii dahje Pedáarii. Orui baicce nu, ahte oahpaheaddji dat beantá doarjjui sudno.

Eará nieiddat hálle jumežiid birra. Ledje suhttan go vávje mo soai hálaiga Piia birra, ja go skuvlašiljus álo manaiga Piia lusa hállat unohisládje, de eará nieiddat lávejedje doarjut su. Renate ja Ida-Márjá manaiga vel rektora lusa hállat jumeš guoktá hárdima birra. Das goit ii mihkkege buorránan. Rektor válddii Piia iežas kantuvrii ja čilgii ahte Káspár ja Pedár leaba olu váivviid vásihan, ja Piia ferte leat šiega sudnuin. Rektor logai maid Piiai ahte skuvla čuovvula hui dárkilit mielde ahte ii oktage oaččo skuvllas givssidit earáid.

...

Imaš mo áššit ovdánit. Dađistaga lei diet givssideapmi šaddan dábálažžan olles luohkkái. Káspár ja Pedár givssideigga Piia. Eará nieiddat heite šiggumis sudno. Gánddat eai lean goassege dahkan maidege. Lei dego jaskes šiehtadus sin gaskkas, ahte dieid áššiide eat seagut gal. Orui Piia mielas ahte nieiddat maid álge su hilgut. Renate ja Ida-Márjá dajaiga oktii Piiai: – Gal don maid fertet smiehttat mo láhttet, ii dát buot sáhte leat dušše jumežiid sivva. Dan maŋŋá Piia ii šat háliidan duhkoraddat Renaten ja Ida-Márjjáin. Muhto go eai lean šat eará skihpárat.

Piias bázii olu áiggi smiehttat mo galggai láhttet eará láhkai. – Jus son livččii ge eará láhkai! – Jus sus livčče guhkes, njuolga vuovttat! – Jus sus livččii groavvásut jietna! – Jus sus livčče...ledje máŋgga, maid sáhtášii sávvat. Muhto son lei nu mo lei, boastut, ropmi, sáhpánjienat nieida. Piias lei miella jávkat. Son logai ovtta girjji nieidda birra gii gahčai muhtun ráigái, ja doppe dien ráiggi siste

lei eará máilbmi. – Vare mun maid gahčašin ráigái, jurddašii Piia mángii.

...

Muhtun idit go Piia morihii, de lei sus nu issoras čoavjebávččas. Son ii veadján oba lihkadit ge. Ledje dego bastilis niibbit mat čuhppe su čoavjji duhát bihtáide, go vikkai lihkadit. Áhčči bođii geahččat manne Piia ii lean lihkkán, ja go oinnii iežas nieiddaža visot šovkkodan, de čuorvvui eatni maid boahit. Soai eaba diehtán mo dál. Áhčči áiggui doavttirfáktái vuolgít dakkaviđe, muhto Piias lei nu bávččas ahte fertii beassat veallát lihkekeahttá. Eadni áiggui doaktára fidnet sin geahčái boahit, muhto nu ii lean gusto vejolaš. Loahpas bođii buohccebiila. Go buohccebiilaolbmot bohte sisa, de oaččui Piia nálu gihtii, ja dan čađa bođii dálkkas mii veahkehii veaháš. De šattai son buohccebiilla mielde, vuos doavttirkantuvrii, ja dasto buohccevissui. Áhčči lei fárus. Doavttir ja buohccebiilaolbmot hálle ahte Piias lea sihkkarit obbalággá rahtasan, muđui ii livčče ná bávččas.

Go bohte buohccevissui, de bidje Piia muhtun latnjii gos lei erenoamáš mašiidna. Dainna mašiinnain besse iskat mii Piia čoavjjis lei boastut.

Piia ja áhčči leigga viehka guhkká dien lanjas. Doavttir iskkai ja iskkai. Obbalággá ii lean ráhtasan, dat lei goit vassis. Ii lean mihkkige boastut dainna. Čoalit muđui ledje juste nu mo galge. Čoavjji lei maid áibbas buorre, mañimuččat ledje buorit, ii lean mihkkige boastut makkárga eará orgánain ge. Loahpas doavttir bijai eret mašiinna, geahčai dárkilit Piiái ja jearai: – Lea go dus buorre dilli muđui?

BARGOBIHTÁT

Dát mitalus nohká fáhkka gaskat. Dás lea jurdda ahte oahppit galget ieža hutkat loahpa. Movttiidahttet ohppiid leat kreatiiva ja hutkat hirpmástuhtti, ilolaš ja váivves loahpaid. Muhtin oahppit soitet háliidit mánga loahpa čállit.

Loga Pii mitalusa ja čále dasa loahpa.
Lohket iežadet loahpaid ceahkis.